

Cisilino (ARLeF) al rispuint a Bullian: «Un progjet fat cun transparence e rigôr, tal rispiet di dutis lis diversitâts»

Il president de Agenzie al sclarìs la cuistion dopo des declarazions dal conseîr regionâl su lis mapis di “Anìn!”

«O pensi che la polemiche dal conseîr regionâl dal Pat pe Autonomie – Civica Fvg, Enrico Bullian, no sedi legjitime, parcè che la siele di doprà propit chê mape, inte suaze di un progjet plurienâl che al è stât volût e sostignût a larc, no je dal sigûr il risultât di une interpretazion libare de ARLeF, ma ben di valutazions colegjâls puartadis indenant cun cure», al à sclarît Eros Cisilino, president de Agenzie regionâl pe lenghe furlane.

La Agenzie di fat, par sclarî la cuistion dopo des peraulis di Bullian, e à mandât fûr une imagjin che e met, une dongje di chê altre e cun didascaliis claris, dôs mapis diferentis dal Friûl. Come che Cisilino al à marcât: *«La mape a çampe, che e à stiçât la polemiche, e je stade realizade daûr de definizion storiche e gjeografiche che e furnîs la Treccani, une font une vore autorevule. A diestre – al à continuât il president – e je rafigurade la cjarte che e segne i confins de aree furlanofone. Come che si pues viodi, lis dôs mapis no coincidin ad implen».*

Il president de ARLeF, che al è lâf ancjemò plui insot tal argument, tal citâ la innomenade e centenarie enciclopedie, al à ricuardât che *«Il Friûl al è descrit tant che il teritori che al va de Livence al Timau. Un teritori (storic) li che si fevelin talian, furlan, sloven, todesc o venit, cjapât dentri il bisiac. Dit chest – al à evidenziât inmò Cisilino – si à di dî che tra i Comuns di lenghe furlane a son ancje Monfalcon e Segrât, che a son te Bisiacarie, ma che a àn domandât a clâr di jentrâ in chê delimitazion cuant che e je stade scrite la Leç 482 dal 1999, anticipade de Leç regionâl 15 dal 1996. Nol è duncje un câs se ancje de Bisiacarie a rivin domandis par aderî aes celebrazions anuâls de Patrie dal Friûl, propit pal fat che il Friûl nol è limitât ae aree furlanofone, ma a chê plui grande fissade di criteris storics. O crôt duncje – al à sierât – che la ARLeF e vedi lavorât cun transparence e rigôr tal realizâ lis mapis di “Anìn!”, rispietant dutis lis diversitâts che, come che e ricuarde la norme, a àn la stesse dignitât e no si escludin une cun chê altre».*

Udin, ai 24 di Fevrâr dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<